

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
GRADSKO VIJEĆE

Broj predmeta: 01-05-03571-2019
Broj akta: 01EN-001
Gračanica, 11.6.2019.. godine

Z A P I S N I K
SA 1. SJEDNICE GRADSKOG VIJEĆA GRADA GRAČANICA

Održane dana 23.05.2019.godine u sali za sjednice nove zgrade Grada Gračanica sa početkom u 14:00h.

Početu sjednice prisustvuje 28 članova Vijeća.

Odsutni su bili vijećnici: Adem Aljić i Ibrišević Alen.

Pored članova Gradskog vijeća sjednici prisustvuju: Gradonačelnik, Gradski pravobranilac, šefovi službi za upravu, državni službenici, predsjednica Etičke komisije Zumreta Kenjar, poslanik u Federalnom parlamentu Rahim Gadžić, službenica za demografski razvoj Ureda OSCE-a Tuzla gosp. Dragica Karadžin, te predstavnici sredstava informisanja.

Sjednicu je otvorio i istom predsjedavao Nihad Krajinović, Predsjedavajući Gradskog vijeća Gračanica, zajedno sa zamjenikom Devedžić Almedinom i sekretarom Tukulj Dženanom.

Zapisnik vodio Iljazović Hazim, a vršilo se i tonsko snimanje sjednice.

Prisutnima se obratio Nihad Krajinović:

„Poštovane kolege vijećnici, uvaženi gradonačelnice sa saradnicima, cijenjeni gosti, predstavnici medija, pozdravljam vas i zahvaljujem što prisustvujete ovom značajnom datumu za Gračanicu za njenu izvršnu i predstavničku vlast.

Ovo je Konstituirajuća sjednica Gradskog vijeća Gračanica, svečanog karaktera.

Započet ćemo je intoniranjem himne Bosne i Hercegovine.

Nakon perioda u kome je administrativnim izmjenama Gračanica imala nekoliko statusa, a posljednji općine, usvajanjem novog Federalnog zakona vratila je status grada koji je prvi put službeno stekla u avgustu 1548.godine carskim ukazom Sulejmana Veličanstvenog. U čast ovog trenutka, a prije radnog dijela sjednice zamolio bih načelnika odnosno od danas zvanično gradonačelnika Grada Gračanica Nusreta Helića da se obrati prigodnim riječima“.

Gradonačelnik Nusret Helić:

„Poštovani građani Gračanice, vijećnici Općinskog, a od danas Gradskog vijeća Gračanica, uvažene kolege, mediji i gosti, zadovoljstvo je i čast danas biti u ovoj ulozi Gradonačelnika Gračanice i imati priliku uputiti zvanično prvu čestitku svim građanima Gračanice.

Gračanica seže u prošlost, daleko više od 500 godina razvijajući se tokom svih ovih stoljeća prema društvenim uređenjima koja su vladala, ali ujedno i neprekidno gradeći duh, tradiciju i identitet otvorenog grada, multikulturalne sredine, dobronamjernih ljudi i poslovne sredine, što je u stvari naš genetski kod. Nije prvi puta da Gračanica ima ovaj status.

Od kraljevskog grada, kasabe, sreza, opštine do grada modernog doba, Gračanica se uvijek oslanjala na vlastite snage i potencijale.

Ukazom Sulejmana Veličanstvenog, davne 1548. godine stekla je status gradskog naselja, a dolaskom Austrougarske Gračanica 1883. godine dobiva i prvu modernu gradsku upravu - Gradsko vijeće sa gradonačelnikom i gradskim poglavarstvom.

Gračanicu vrijeme nije mazilo, prolazila je kroz težak period u svom razvoju, da bi sedamdesetih godina prošlog stoljeća doživjela veliki napredak koji traje i danas i trajat će sigurno u budućnosti.

Nakon višegodišnjih aktivnosti Gračanica je 1. Aprila, a da pri tome nije prvoaprilska šala, zaista postala grad. Ispunjavajući sve zakonske kriterije zaslužila je ovaj novi status sa povlasticama i privilegijama kakve uživaju gradske sredine na istoku i zapadu, ali i obavezom da zajedno, svako od nas pojedinačno i kao kolektiviteti koji djeluju kroz mnogobrojne institucije, kompanije i udruženja građana, stvaramo još bolje uslove za život građana i budućnost naraštaja koji dolaze.

Posebno sam sretan što se moja vizija „Sela približiti Gračanici“, „Gračanicu učiniti gradom“, još iz kampanje za izbore 2004. godine i ostvarila.

Čestitajući ovaj značajan događaj, želim se zahvaliti posebno svima onima koji su dali podršku Odluci da pokrenemo vraćanje statusa grada ovoj sredini uz želju da ćemo pozitivne efekte osjetiti svi skupa vrlo brzo. Zahvaljujem se vama uvaženi vijećnici što ste prepoznali inicijativu i dali svoj glas za podnošenje zahtjeva za proglašenje Gračanice gradom.

Simbolično je ali i značajno da Gračanica baš ovih dana obilježava značajne datume iz svoje prošlosti ostajući dosledna svojoj tradiciji, te i ovaj dan možemo slaviti i uživati u našim značajnim uspjesima.

U vrijeme koje je pred nama vjerujem u još jaču i intenzivniju saradnju svih nas da ozračje prijateljstva i razumijevanja koje nas je uvijek krasilo rezultira ostvarenjem i najzahtjevnijih ciljeva.

Na kraju želim, da u svečanoj atmosferi donesemo i akte koji su na dnevnom redu, te stvorimo i formalne pretpostavke za provođenje Zakona o gradu Gračanica i počnemo funkcionisati kao grad. Hvala“.

Nihad Krajinović:

„Hvala Gradonačelniku Heliću.

Općinsko vijeće Gračanica na sjednici održanoj dana 31. Maja 2017.godine donijelo je Odluku o proglašenju Grada Gračanica. Odluka predstavlja prvi korak u proceduri uspostave Grada Gračanica i na osnovu nje se trebao donijeti Federalni zakon kojim će biti uspostavljen Grad. Prijedlog Zakona o gradu Gračanica usvojio je Predstavnički dom Parlamenta Federacije Bosne i Hercegovine 28. februara 2019.godine, a na prvoj sjednici Doma Naroda Parlamenta Federacije BiH održane 1. aprila ove godine, po skraćenom postupku kojim je usvojen prijedlog Zakona o Gradu Gračanica.

Zakon o Gradu Gračanica objavljen je u „Službenim novinama Federacije BiH“, broj 30/2019, od 8. maja 2019.godine i stupio je na snagu 16. maja tekuće godine. Odredbom člana 9. Zakonom je propisano da će općinski vijećnici, Općine Gračanica izabrani na Općinskim izborima za Općinu Gračanica održane 2016.godine donijeti Privremenu

statutarnu odluku grada Gračanica u roku od dva mjeseca od dana stupanja ovog Zakona koja će važiti do donošenja Statuta Grada. Bez navedenih dokumenata nije moguće promijeniti statistički broj, memorandume, table, donijeti rješenje o novim organizacijskim jedinicama, izvršiti i niz drugih administrativni procedura koji je oko dvadesetak. Da bi se donijela privremena statutarna odluka, bilo je neophodo održati prvu konstituirajuću sjednicu koja je po Zaključku Kolegija zakazana za danas.

Današnjoj sjednici prisustvuje 28 vijećnika, a odsutni su: Alen Ibrisević i Adem Aljić.

Obzirom da sjednici prisustvuje dovoljan broj vijećnika, konstatujem da imamo kvorum za održavanje sjednice, te otvaram prvu konstituirajuću sjednicu Gradskog vijeća Gračanica.

Za današnju sjednicu predlažem sljedeći dnevni red koji je utvrdio Kolegiji Vijeća:

1. Razmatranje i usvajanje statutarne Odluke o organizaciji Grada Gračanice u skladu sa Zakonom o Gradu Gračanica.
2. Svečana izjava vijećnika i potpisivanje svečane izjave.
3. Razmatranje i usvajanje Odluke o pečatu Grada Gračanica.
4. Razmatranje i usvajanje Odluke o organizaciji i djelokrugu rada jedinstvenog gradskog organa uprave Grada Gračanica.

Nije bilo učesnika u diskusiji i dnevni red 1. Konstituirajuće Sjednice Gradskog Vijeća je jednoglasno usvojen.

**TAČKA 1.
RAZMATRANJE I USVAJANJE STATUTARNE ODLUKE O
ORGANIZACIJI GRADA GRAČANICA U SKLADU SA ZAKONOM O
GRADU GRAČANICA**

Zamolio bih i pozivam sekretara Vijeća Dženanu Tukulj da nam obrazloži Statutarnu Odluku.

Dženana Tukulj:

„Prije svega dobar dan svima, čestitam nam svima i gradskim vijećnicima, Gradskom vijeću, Gradonačelniku i mojim prisutnim kolegama i građanima koji su danas ovdje sa nama. Već je predsjedavajući u uvodnom dijelu obrazložio zašto je potrebno i šta je pravni osnov bio za donošenje ove Odluke. Ja ću reći nešto malo o Odluci. Ona je pravni akt sa statutarnom snagom i vrijedi do donošenja Statuta Grada Gračanica. U potpunosti je usaglašena sa Zakonom o gradu koji ste dobili u Vašim materijalima uz ovu Odluku. Želim da napomenem da ovom Odlukom ustvari ostavljamo sve dokumente koji su do sad doneseni, na snazi do donošenja novih. Bilo je pitanja vijećnika, naš Statut i Poslovnik ostaje na snazi, ukoliko nisu u suprotnosti sa zakonom i ovom statutarnom Odlukom. Kod nadležnosti prenesene su nadležnosti koje su u našem postojećem Statutu Općine Gračanica i ovdje bi

samo jedan dio napomenula kod prenošenja tih nadležnosti u Članu 8. Tačka 13. ostalo je greškom zamjenika predsjedavajućeg Općinskog vijeća, treba da piše Gradskog. Tačka 15. Izvještaj o provođenju općinske politike, treba da piše politike Grada i u tački 16. gdje stoji Osniva preduzeće ustanove za obavljanje poslova od interesa za Općinu, treba da piše za Grad.

Uz svoje materijale dobili ste i prijedlog zaključka za komisiju. Donošenjem ove Odluke mi bi trebali da odredimo ko će pripremati Statut i u kojem vremenskom roku treba da dobijemo taj nacrt.

U zaključku koji je došao uz prijedlog ove statutarne Odluke se nalazi prijedlog da to bude u roku od 120 dana, iz prostog razloga što ulazimo u period godišnjih odmora i da se ostave komisije, ali evo o tome možemo raspravljati. Uz ovu Odluku predlažem da se i donese zaključak kojim se Komisija za propise i Statut obavezuje da najkasnije u roku od 120 dana pripremi nacrt Statuta Grada Gračanica i dostavi ga Gradskom vijeću.

Nije bilo učesnika u diskusiji i Statutarna Odluka o organizaciji Grada Gračanica u skladu sa Zakonom o Gradu Gračanica je usvojena jednoglasno.

TAČKA 2

Svi prisutni vijećnici su dali svečanu izjavu i potpisali je, a ona glasi:

SVEČANA IZJAVA VIJEĆNIKA I POTPISIVANJE SVEČANE IZJAVE

„Svečano izjavljujem i obavezujem se da ću povjerenu dužnost vijećnika Gradskog vijeća Gračanica obavljati savjesno i odgovorno, da ću se pridržavati Ustava Bosne i Hercegovine, Ustava Tuzlanskog kantona, Zakona i Statuta i zalagati se za ljudska prava i slobode i da ću u svim prilikama štiti interes Države Bosne i Hercegovine, Federacije Bosne i Hercegovine, Tuzlanskog kantona i Grada Gračanice i ravnopravnost naroda i građana.“

TAČKA 3

RAZMATRANJE I USVAJANJE ODLUKE O PEČATU GRADA GRAČANICA

Nije bilo učesnika u diskusiji i Odluka o pečatu Grada Gračanica je usvojena jednoglasno.

TAČKA 4

RAZMATRANJE I USVAJANJE ODLUKE O ORGANIZACIJI I DJELOKRUGU RADA JEDINSTVENOG GRADSKOG ORGANA UPRAVE GRADA GRAČANICA

Nije bilo učesnika u diskusiji i Odluka o organizaciji i djelokrugu rada jedinstvenog Gradskog organa uprave Grada Gračanica je usvojena jednoglasno.

Sjednica je završena u 14,35 sati

ZAPISNIK VODIO
Iljazović Hazim

PREDSJEDAVALAČI
GRADSKOG VIJEĆA
Nihad Krajinović

